

खबरां

1. भारत ते इंडोनेशिया बश्कार संयुक्त आयोग दी 8मीं बैठक नमीं दिल्ली च सम्पन्न। दौनें धड़ें आपूं च व्यापक रणनीतिक सांझेदारी तैहत सरबंघें दी समीक्षा कीती।
2. केंद्री गृह मंत्री अमित शाह होरें अंतरराष्ट्र बन्ने कन्नै लगदे इलाकें च माली लैन-देन, भवन निर्माण ते संपत्तियें दी खरीददारी ते बिक्री पर सख्त निगरानी रखने दा आह्वान कीता ऐ।
3. सी.बी.एस.ई दे 12मीं दे मतेयानें दे पेपरें दी रिइवैलुएशन लेई आलाइन दरखास्त देने दी अज्ज अखीरी तरीक ऐ।
4. राश्ट्री पुरस्कार विजेता ते मलयालम अभिनेता सलीम कुमार हुंदी मौत, प्रधानमंत्री नरेंद्र मोदी होरें उंदी बेटेमी मौत पर दुख प्रगट कीता।
5. मौसम विभाग नै अगले 3 दिनें दरान देसै दे मते सारे हिस्सें च भारी बरखा दी पेशनगोई कीती ऐ।
6. अफगानिस्तान खलाफ टैस्ट मैच च भारी दी स्थिति मजबूत, भारत नै 564 रन पर अपनी पैहली पारी घोशित कीती, अफगानिस्तान दुए रोज दा खेड्ड मुक्कने पर 113 पर खेडा'रदा ऐ।

<><><><><>

India-Indonesia

भारत ते इंडोनेशिया बश्कार संयुक्त आयोग दी 8मीं बैठक नमीं दिल्ली च अज्ज संज्ञा सम्पन्न होई गेई जेदी अध्यक्षता भारत दे विदेश मंत्री डा. एस जयशंकर ते इंडोनेशिया दे विदेश मंत्री सुगियोनो होरें कीती। बैठका च दौनें नेताएं भारत इंडोनेशिया व्यापक रणनीतिक सांझेदारी दे तैहत सरबंघें दी समीक्षा कीती जिंदे च रक्षा सुरक्षा, समुंद्री सहयोग, बपार, निवेश, सेहत ते फार्मास्यूटिकल जनेए मुख्ख क्षेत्र शामिल ना। एहदे अलावा फिनटेक, क्रिटिकल, मिन्नल्स, अंतरिक्ष, शिक्षा, डिजिटल विकास, रसैनी हैल ते सैलसफा जनेए क्षेत्रें च सहयोग बधाने बारै बी दौनें धड़ें अपनी बचनबद्धता पक्की कीती।

<><><><><>

US-Iran 100 days

अमरीका ते ईरान बश्कार चला करदे संघर्ष गी 100 दिन पूरे होई गे ना। फरवरी दे खीरै च इरान पर अमरीका ते इजराइल दे हमलें कन्नै एह संघर्ष शुरू होआ हा जेहडा हून इक बड्डा क्षेत्रीय संकट च तब्दील होई चुके दा ऐ। इस संघर्ष कन्नै होमुर्ज जलडमरूमध्य च समुंद्री जहाजें दी आओजाई लेई खतरा ते लेबनान च बी नमें सिरेआ तनोतनी आहली स्थिति पैदा होई गेदी ऐ। अज्ज 100में रोज बी होमुर्ज च जबरदस्त तनोतनी बनी दी ऐ। अमरीकी सेंट्रल कमांड मूजब सेना नै ईरान दे 2 हमलावर ड्रोन मारी सुट्टे ना। एहदे शा पैहले शुक्रवारें बी अमरीका नै ईरान दे 4 ड्रोन तबाह करी दित्ते हे ते ईरान दे गोरूक ते केशम टापुएं पर स्थित रडार ते निगरानी ठकानें परहमले कीते हे। एहदे परते च ईरान नै शनिवारें कुबैत ते बहरीन च अमरीकी ठकानें पर बैलिस्टिक मिसाइलें कन्नै हमले कीते हे।

<><><><><>

EU-Delegation

यूरोपी संघ दा इक उच्ची सतह दा प्रतिनिधिमंडल 2 दिनें दे दौरे पर कल गोवाहाटी पुज्जोग। एहदा मकसद भारत दे पूर्वोत्तर राज्यें कन्नै साथ-सहयोग गी मजबूत बनाना ऐ। यूरोपी संघ दी चर्चा उनें क्षेत्रें पर केंद्रित होग जिंदे च यूरोप ते पूर्वोत्तर दे सांझे हित शामिल होंगन। इन्दे च नवीकरणीय उर्जा, हरित उर्जा, टिकाउ शैहरी बुनियादी ढांचा, सेहत सेवा ते दवा निर्माण सरबन्धी क्षेत्र शामिल ना।

<><><><><>

केंद्री गृह मंत्री अमित शाह होरें अंतरराष्ट्री बन्ने पर माली लैन-देन, भवन निर्माण ते संपत्तियें दी खरीद बिक्री पर सख्त निगरानी रक्खने दा आह्वान कीता ऐ। एह निर्देश श्री शाह हुं'दी अध्यक्षता च बीएसएफ दे त्रिपुरा सीमा मुख्यालय च पूर्वोत्तर राज्य दे बन्ने आले इलाकें दे सरबंध्यै च होई दी बैठक दे दरान दित्ता गेआ। गृह मंत्री होरें पिच्छले 5एं बरें दे जिमीं रिकार्डें दी जांच कराने दा बी निर्देश दित्ता। शाह होरें आखेआ जे नशीले पदार्थें ते थेहारें दी तस्करी दे खलाफ लगातार अभियान चलाए जाने लोडचदे न ते नशीले पदार्थें दी तस्करी च शामिल सब्भन लोके खलाफ सख्त कार्रवाई कीती जानी चाहिदी। उनें आखेआ जे बन्ने आले जिलें च माली अनुशासन जकीनी बनाना, राज्यें दी जिम्मेदारी ऐ। शाह होरें कलेक्टरें ते जीएसटी अधिकारिणं गी सिखलाई देने ते केंद्री प्रतख टैक्स बोर्ड-सी.बी.डी.टी गी नकली करंसी दा सर्वेक्षण करने दा निर्देश दित्ता।

<><><><><><>

ITA

अंतरराष्ट्री ब्हाई परिवहन संघ नै एशिया प्रशांत क्षेत्र च विमानन दे विकास च भारत दी भूमिका गी महत्वपूर्ण दस्सेआ ऐ। इस खेत्र च 2044 तगर ब्हाई यात्रिणं दी गिनतरी 4 अशारिया 1 अरब तगर पुज्जने दा अंदाजा ऐ। अंतरराष्ट्री ब्हाई परिवहन संघ दे एशिया-प्रशांत क्षेत्र दे उपाध्यक्ष शेल्डन ही नै कल ब्राजील च दस्सेआ जे भारत पिछले केई बरें थमां इस क्षेत्र दे विमानन विकास च महत्वपूर्ण योगदान देआ'रदा ऐ। उनें आखेआ जे भारत दुनिया दे सब्भन थमां तेजी कन्नै बददे घरेलु नागरिक विमानन बजारें च इक ऐ। रेल्डन ही होरें एह बी आखेआ जे एशिया प्रशांत क्षेत्र च पिछले 5 सोयां 10 बरें च मजबूत बादा होआ ऐ ते भविष्य च बी एहदे मजबूत बने रौहने दी मेद ऐ। अंतरराष्ट्री ब्हाई परिवहन संघ 370 थमां मती एयरलाइनें दी अगुवाई करदा ऐ।

<><><><><><>

CBSE-Re Evaluation

12मीं जमात दे नतीजे जारी होने मगरा सरबन्धी मुद्दें दी जांच ते उत्तर पुस्तिकाएं दे परतिऐ मुल्यांकन आस्तै आनलाइन आवेदन जमा करोआने दी अज्ज अखीरी तरीक ऐ। केंद्री माध्यमिक शिक्षा बोर्ड नै सोशल मीडिया पोस्ट च दस्सेआ ऐ जे पोर्टल अद्धी राती तगर खुल्ले दा रौहग। बोर्ड नै छात्रें थमां आग्रह कीता ऐ जे ओहू खीरी तरीक थमां पैहले अपना आवेदन भरिए जमा करोआई लैन।

<><><><><><>

NTA-Refutes Media Claims

राष्ट्री परीक्षा एजेंसी-एनटीए नै सोशल मीडिया ते मैसेजिंग मंचें पर नीट यूजी-2026 दे परतियै लैते जाने आहले पेपर दे क्वश्चन पेपर दे कथित तौरा पर लीक या बिक्री होने दे दावें गी सिरे थमां खारज करी दित्ता ऐ। एनटीए नै आखेआ ऐ कि विद्यार्थिणं ते उंदे परिवारें दिएं चिंताएं दा फैयदा ठोआने आहले संगठित गिरोहें दा कम्म ऐ। एजेंसी नै सक्रिय तौर पर एतराजजोग चैनलें, खातें ते सामग्री दी पंछान करियै सरबन्धित मंचें दे खलाफ तुरत कार्रवाई करने दी चेतावनी दिती ऐ। बोर्ड दा आखना ऐ कि झूठे दावें पर विद्यार्थिणं ते उंदे अभिभावकें गी यकीन नेई करना लोडचदा।

<><><><><><>

TDP-Candidates

तेलगु देशम पार्टी नै 18 जून गी होने आहले राज्यसभा चुनाएं लेई अपने त्रै मेदवारें दे नाएं दी घोशणा करी दिती ऐ। टीडीपी दे राष्ट्री अध्यक्ष एन. चंद्रबाबू नायडू होरें मेदवारें दी सूचि अज्ज जारी कीती। पार्टी नै उद्योगपति सना सतीश, शिक्षाविद भाष्यम रामकृष्ण ते टीडीपी सोशल मीडिया विंग दे प्रमुख चितंकयाला विजय होरें गी मेदवार बनाया ऐ।

<><><><><><>

केंद्री जांच ब्यूरो नै आई.डी.एफ.सी फ्रूट बैंक ते ए.यू फाइनान्स धोखाधड़ी मामले दी जांच दे सिलसिले च चंडीगढ़, पंचकुला ते दिल्ली एनसीआर इलाके च 6एं थाहरें पर छापेमारी कीती ऐ। एह मामला हरियाणा सरकार दे 8 मैहकमे ते चंडीगढ़ नगर निगम ते चंडीगढ़ रिन्यूएबल एनर्जी, साइंस एंड टेकनालजी सोसायटी-क्रेस्ट दे 2 विभागें च 661 करोड़ रपे दे गबन ते सरकारी पैसे च हेराफेरी कन्नै सरबंधित ऐ।

<><><><><><>

Govt.-LPG

सरकारै अज्ज आखेआ ऐ कि अंतरराष्ट्री एलपीजी कीमतें च भारी बाढ़े दे बावजूद भारतीय कुम्बे गी घरेलू रसोई गैस दुनिया च सब्बनें शा सस्ते भाएं पर थ्होआ करदी ऐ। पेट्रोलियम ते कुदरती गैस मंत्रालय नै इक बयान च आखेआ ऐ कि भारती सिलेंडर कुसै बी गोआंडी मुख्य दे मकाबले च सस्ते न ते अमरीका आस्ट्रेलिया ते कनाडा जनेए विकसित अर्थ बवस्थाएं दे मकाबलें च बी काफी घट्ट न। पच्छिम एशिया च हाल दे संकट दरान उर्जा सुरक्षा गी यकीनी बनाने लेई पुट्टी गेदी गैई दा जिक्र करदे होई सरकारै आखेआ ऐ कि भारत गिने चुने दे किश ऐसे मुखें च शामिल रेहा ऐ जिनें समुंद्री ट्रांसपोर्ट च गंभीर रूकावटें दे बावजूद होमर्ज जलडमरूमध्य दे रस्तेया उर्जा सप्लाई गी बरोबर बनाए रखेआ। सरकारै मूजब मुखै च पेट्रोलियम उत्पादें दी कोई कमी नेई होई ते एलपीजी दी सप्लाई बी निर्विघ्न जारी रेही। मंत्रालय नै दस्सेआ ऐ कि प्रधानमंत्री उज्ज्वला योजना दे लाभार्थीएं गी 14 इशारिया 2 किलोग्राम आहले एलपीजी सिलेंडर पर विशेष राहत थ्होआ करदी ऐ।

<><><><><><>

LPG-Prices Increased

मुखै च अज्ज घरेलू रसोई गैस दी कीमत च दना'क बाढ़ा कीता गेआ ऐ। 14 किलो 200 ग्राम आहले सिलेंडर दे भाऽ च 29 रपे दा बाढ़ा कीता गेआ जेदे बाद दिल्ली च घरेलू रसोई गैस सिलेंडर दी कीमत 913 रपे थमां बढ़ियै 942 रपे होई गेई ऐ। सरकारै आखेआ ऐ जे अंतरराष्ट्री एलपीजी कीमतें च बढ़ा मता बाढ़ा होने दे बावजूद भारती घरें गी रूट्टी पकाने दी गैस वैश्विक स्तर पर सब्बनें थमां घट्ट कीमत पर थ्होआ'रदी ऐ।

<><><><><><>

Salim Kumar Dies

राष्ट्री पुरस्कार विजेता ते मलयालम अभिनेता सलीम कुमार हुंदा 57 बरें दी उम्री च काल होई गेआ। ओह पिछले किश अर्से थमां कसरी हे ते इक प्राइवेट अस्पताल च उंदा इलाज चलै करदा हा। 3 दहाकें दे अपने फिल्मी सफर दरान सलीम कुमार नै कोई साडु त्रै सौ फिलमें च कम्म कीता। प्रधानमंत्री नरेंद्र मोदी होरें उंदी बेटैमी मौत पर गहरा दुख प्रगट कीता ऐ।

<><><><><><>

Weather

मौसम विभाग नै अगले दो-त्रै दिनें दरान देसै दे केई हिस्सें च भारी बरखें दी पेशनगोई कीती ऐ। मैहकमे मताबक दक्खन पच्छिम मानसून अगो बधा'रदा ऐ जेह्दे कन्नै महाराष्ट्र, कर्नाटक, आंध्र प्रदेश, तेलंगाना, तमिलनाडू ते पूर्वोत्तर राज्यें च तेज बरखा बरी सकदी ऐ। एह्दे कन्नै गै कल तटीय कर्नाटक, केरलम, माहे, उप हिमालयी, पच्छिम बंगाल ते सिक्किम च बी भारी बरखा होई सकदी ऐ। उआं दिल्ली, पंजाब, हरियाणा, चंडीगढ़, पच्छिम राजस्थान ते तटीय आंध्र प्रदेश च गर्मी दा प्रकोप बरोबर जारी रौहगं इनें इलाकें च अगले 4 दिनें तगर लू चलने दी मेद ऐ। उत्तर पच्छिम ते मध्य भारत च तापमान च 2 कोला लेइयै 6 डिग्री सेल्यिस तगर बाढ़ा होई सकदा ऐ।

<><><><><><>

Mandavia-Cycling

युवा मामले ते खेडू मंत्री मनसुख मांडविया होरें अज्ज बड्डलै नमीं दिल्ली च फिट इंडिया संडेज आन साइकल पैहल दे 77में संस्करण च हिस्सा लैता। इस मौके उनें आखेआ कि साइकल चलाने कन्नै माहनू तंदरुस्त रौहंदा ऐ। पेट्रोल दी बचत होंदी ऐ ते वायु प्रदूषण बी घट्ट होंदा ऐ।

<><><><><><>

AP- Gov. Greets Akashvani

आंध्र प्रदेश दे गवर्नर जस्टिस एस. अब्दुल नजीर होरें आकाशवाणी दे 90 बरे पूरे होने पर मुबारकबाद दिती ऐ। भारती लोक प्रसारण दे इतिहास च इस अवसर गी इक महत्वपूर्ण पल करार दिंदे होई गवर्नर होरें पिछले 9 दाहकें शा समाज च अनमुल्ला योगदान देने लेई आकाशवाणी दी सिफत कीती।

<><><><><><>

Cricket

भारत ते अफगानिस्तान बश्कार न्यू चंडीगढ़ च खेड्डे जा'रदे टैस्ट मैच दे दुए ध्याड़े दा खेड्ड मुक्कने पर अफगानिस्तान नै अपनी पैहली बारी च 5 विकेटें दे नुकसान पर 113 रन बनाई लैते दे हे। एहदे शा पैहले भारत नै 8 विकेटें पर 564 रन बनाइयै अपनी पारी घोशित करी दिती। कल टास जित्तियै पैहले बल्लेबाजी करदे होई भारती टीम दी तरफा यशस्वी जायसवाल ते के.एल राहुल दी सलामी जोड़ी नै पैहली विकेट लेई 41 रन बनाए। जायसवाल 32 गेंदें च 24 रन बनाइयै आउट होए। मगरा के.एल राहुल नै साई सुदर्शन कन्नै दुए विकेट लेट्र 139 रन बनाए।

<><><><><><>

PM-Saff Football

प्रधानमंत्री नरेंद्र मोदी होरें भारती महिला फुटबाल टीम गी सैफ महिला चैंपियनशिप 2026 जित्तने पर बधाई दितती ऐ। सोशल मीडिया पोस्ट च उनें आखेआ जे टीम नै पूरे टूर्नामेंट च शानदार प्रदर्शन कीता। मोदी होरें आखेआ जे इस जित्त कन्नै औने आले समें च युवाएं गी फुटबाल खेड्डने दी प्रेरणा थोगा।

<><><><><><>

LG-Wreth Laying

उपराज्यपाल मनोज सिन्हा होरें लेफ्टिनेंट बीरेश्वर गोस्वामी होरें' गी श्रद्धांजलि भेंट कीती। लेफ्टिनेंट गोस्वामी होरें राजौरी जिले च आतंकवाद रोधी तपाशी अभियान दरान मुश्कल ते कठन इलाकें च अपनी ड्यूटी गी अंजाम दिंदे होई अपना सर्वोच्च बलिदान दितता। जम्मू दे एयर फोर्स स्टेशन च श्रद्धांजलि कार्यक्रम दा सरिस्ता कीता गेआ। इस दरान मंत्री जावेद राणा, व्हाईट नाइट कोर दे जीओसी लेफ्टिनेंट जनरल पी.के मिश्रा, डी.आई.जी नलिन प्रभात, मुख् सचिव अटल डुल्लू, सेना, पुलिस ते सिविल प्रशासन दे होर दुए अधिकारी मौजूद हे।

<><><><><><>

VD-Yatra

रियासी जिले दी त्रिकुटा पहाड़िएं च स्थित श्री माता वैश्वो देवी जी दी पवित्तर श्राइन च इस्सलै यात्रिएं दा बड़ा मता रश दिक्खने गी लब्बा'रदा ऐ। एह यात्रा सुचारू ढंगगै सिर जारी ऐ। भवन च भारी रश गी दिखदे होई यात्रा लेई पंजीकरण गी किश घंटें लेई शनिवारें संजा बंद करी दित्ता गेआ हा। एह पंजीकरण अज्ज बडुलै परतिए शुरू होई गेआ ऐ। इसलै पवा'रदी बड़ी मती गर्मी दे बावजूद ज्हारां बदे श्रद्धालु कटड़ा पुजा'रदे न ते पवित्तर श्राइन दे दर्शन करा'रदे न।

<><><><><><>

DC-Reasi Shiv Khor

रियासी दे डिप्टी कमिशनर कुमार अभिषेक होरें शिव खोड़ी श्राइन च चला'रदे विकास कम्में दी प्रगति दा जायजा लैने लेई इक व्यापक समीक्षा बैठक दी अध्यक्षता कीती जेदे च शिवखोड़ी भवन च हैलीपैड ते एहदे कन्नै जुडी दी ढांचागत परियोजनां बी शामिल न। बैठक च पवित्तर गुफा दे नेडे हैलीपैड च अगग सुरक्षा प्रणालियें गी मजबूत करने ते आपात कार्रवाई सरबन्धी तैयारियें गी बधाने पर ध्यान केंद्रित कीता गेआ। एहदे अलावा तगडे सुरक्षित ते कुशल तरीके राहें हैलीकाप्टर संचालन गी यकीनी बनाने लेई बी तफसीली चर्चा कीती गेई। डी.सी होरें पीडब्ल्यूडी दे एग्जीक्यूटिव इंजीनियर होरें'गी निर्देश दित्ते जे ओहू हैलीपैड कन्नै लगदे इलाके गी समतल करने ते पायलट रूम दे निर्माण लेई एस्टीमेट तैयार करन।

<><><><><><>